

‘Pesterij’ ta maneho di Minister Ursell Arends cu Aruparking

MINISTER demisionario Ursell Arends, ta sigui cu su campaña di intimidacion cu ta muestra mas riba un tipo di ‘pesterij’ pa asina trata di impone su vision riba Aruparking pa loke ta stacionamento den centro di Oranjestad.

Henter e proceso aki ta uno cu den cierto forma ainda no tin un base legal, ya cu Aruparking cu a start sali cu uzo di e famoso “klem” geel pero esakinan a algun aña caba ya no ta den servicio. Mesun cos a sosode cu e “takelwagen” cu tabata move autonan cu no a paga pa staciona na cierto sitio, no ta wordo uza mas ya cu Aruparking no por a carga e gasto di uzo di e truck aki. Minister Ursell Arends a yega na mando y a dicidi cu parti di su maneho ta di bolbe pone Aruparking den servicio y a bay over na drecha e mashinnan cu tabata dañá y di cual ainda te awe tin algun cu no ta funciona debidamente.

Sinembargo henter e proceso aki a bira un problema na momento cu e unico “accion” cu Aruparking a keda na su disposicion tabata di pega e famoso sticker oranje, cu no tin ningun balor agrega pero sin ta duna doño di e auto, trabou pa ranca y elimina e sticker aki bek.

Na mes momento tin cu señala cu ningun oficial di Aruparking ta pega sticker oranje riba autonan di huur, pues di turistanan cu ta staciona nan auto sin cu ta paga pa esaki.

Tin di e bishitantenan cu ta paga sin cu nan ta na altura cu nan no ta obliga pa haci esaki loke ta muestra riba un tipo di gañamento pero ningun auto di huur ta ricibi un sticker oranje.

Durante di vacacion escolar, e pegamento di sticker oranje aki a stagna totalmente ya cu no por a nota ningun oficial di Aruparking canando den centro di ciudad pa trata di organisa henter e sistema di stacionamento.

Tambe ta notabel cu e accion di pega



sticker aki como un tiki di ‘pesterij’ ta tuma luga mas tanto den oranan di mainta ya cu despues di merdia esaki no ta tuma luga pero e insistencia di Minister Arends pa sigui pa sigui ehecuta un proceso cu no ta totalmente organisa, tambe ta un forma di mal maneho y hasta por papia aki di un falta di integridad den maneho di e lider di RAIZ.

Esaki pa motibo cu no tin consistencia den henter e proceso aki di cobra doñonan di auto pa staciona esaki den centro di Oranjestad ya cu no ta un control cu ta tuma luga henter dia, tin dia oficialnan di Aruparking ta visibel y notabel pero tin oranan largo cu nan funcionamiento no ta existi mes.

Minister di integridad y transporte Arends, tabata determina na inicio di su periodo como mandatario, pa atende

cu e asunto di sushi di cas y a bay over na cera e dump na Parkietenbos pero esaki tampoco a duna e resultado adecuado loke a pone cu awor rond di henter e isla, tin diferente dump caminda ciudadanonan cu no tin placa pa hiba nan sushi caminda gobierno of Minister Arends kier pa hiba esakinan, ya cu nan situacion financiero ta sumamente delicado.

Awor tin e asunto di Aruparking cu ta funcionando sin cu Minister Arends tin hustificacion pa esaki y tin ciudadanonan cu ta wordo perhudica pa e maneho “schot en scheef” aki.

E asunto di sigui pega sticker na auto di ciudadanonan, ta un tipo di ‘pesterij’ y den e tempo aki di eleccion pa un gobierno nobo, e ta wordo considera como un tipo di “politieke pesterij.”